

Ini Sa Igsulat I NIHIMIYAS

Ini Denu Sa Igsulat I Nihimiyas

Si Nihimiyas sa sebaen etaw Hudiyu nekeugpà diyà sa tanà Babiloniya. Kagdi ma sa sebaen tegetabang diyà si Datù Altahilis. Pinepelikù sa datù kagdi diyà sa menuwa Hélusalém, anì petigdegen di dema sa kutà, agulé nebaluy dé kagdi sa ulu-ulu diyà sa medoo etaw Hudiyu. Diyà siini libelu, hauwen ta “sa mepion ketabang i Nemula” (kansad 2:8) anì mebaluy mekepelikù sa etaw Hudiyu diyà sa metudà kesimbà da diyà si Datù Nemula (kansad 9:2-3).

Ini Sa Egoh I Nihimiyas Migsimbà Denu Sa Menuwa Hélusalém

1 ¹Na, ini sa tinulon i Nihimiyas anak i Hakaliya. Diyà a sa menuwa Susa, egoh sa bulan pinengadanan da Kisléb^a diyà sa keduwa di pulù gepalay sa lugay i Altahilis migkedatù diyà sa tanà Pélsiya. ²Hê, migtebow Hanani i sa duma telahadi ku owoy sa medoo duma di kedu Huda dò. Agulé inigsaan ku kagda denu sa medoo etaw Hudiyu tapay eg-ugpà diyà sa tanà Huda sa endà nekeunut diyà sa medoo etaw nesigkem^b owoy denu sa medoo egkebaelan ma diyà sa menuwa Hélusalém.

³Sinagbian da aken, guwaen da, “Siedò medoo etaw migpelikù kedu diyà sa neangayan da egoh da nesigkem,^c egkelikutan da temù diyà sa menuwa da owoy kagda ma sa egpeumàumaan sa medoo etaw beken Hudiyu eg-ugpà medapag diyà kenagda. Owoy tapay ma doo nelukat sa kutà diyà sa menuwa Hélusalém owoy endà ma mepelumanan sa medoo pintù di edung sa egoh di neulow.”

^a **1:1** Sa bulan Kisléb sa kesiyow di gebulan diyà sa palay sa medoo Hudiyu, owoy mig-edung diyà sa neteliwadaan Nobémbeli taman nekeuma diyà neteliwadaan Disémbeli.

^b **1:2** Mebaluy ma iya sa selepangan di sa medoo Hudiyu migpelikù kedu diyà sa neangayan da egoh da nesigkem. ^c **1:3** Mebaluy ma iya sa selepangan di sa medoo Hudiyu endà nesigkem owoy tapay da eg-ugpà diyà sa tanà Huda.

⁴Na, egoh ku migdineg iya wé, migpenuu a owoy migsinegaw a ma. Agulé nelugaylugay a nebukul. Pineulan ku sa kekaen ku danà ku tigtu nebukul owoy migsimbà a ma diyà si Nemula, sa Nemula diyà langit. ⁵Migsimbà a, guwaen ku, “O Datù Nemula, sa Nemula diyà langit, kuna sa épê dakel egkegaga owoy egkelimedangan ké diyà keniko. Kesaligan ka egpetuu sa nesepasadan yu sa medoo etaw eghidu keniko owoy egpangunut ma diyà sa medoo igsugù ko. ⁶Hahaa ko aken i egsugùsuguen ko, owoy dinegdineg ko ma sa kesimbà ku diyà keniko, enù ka isimbà ku sigep owoy agdaw sa medoo etaw ko tegeIslaél. Egtulonen ku sa egoh ké nesalà diyà keniko, kami i medoo tegeIslaél. Nesalà sa medoo tupù ku owoy aken ma. ⁷Tigtu medaet sa binaelan ké diyà keniko danà ké endà egpangunut diyà sa medoo igsugù ko owoy diyà sa medoo uledin igbegay ko diyà kenami sa igpesugkow ko diyà si Mosis sa egsugùsuguen ko egoh anay.

⁸“Ketulengi ko sa inikagi ko diyà si Mosis, guwaen ko, ‘Amuk endà tigtu yu mangunut diyà kenak, sepalaken ku kiyu diyà sa medoo balangan tanà. ⁹Dodoo amuk pelikù yu diyà kenak owoy amuk pangunutan yu dema sa medoo igsugù ku, setiponen ku dema kiyu pelikù diyà sa tanà hinemilì ku sa kenà yu sumimbà diyà kenak, apiya di pa nesepalak yu dé dutu mediyù dò.’

¹⁰“O Datù Nemula, isimbà ku sa medoo egsuguen ko sa etaw inalukan ko danà sa dakel tunung ko owoy sa egkegaga ko ma. ¹¹Dinegdineg ko sa kesimbà ku owoy sa kesimbà sa medoo liyu egsuguen ko egkeiyap egpedakel keniko. Begayi ko aken mepion ini egoh di anì metuuwan sa datù diyà kenak anì ipetuu di sa ungayà ku.”

Na, egoh iya, aken sa atung eg-itis sa wain eg-inemen sa datù.

Ini Sa Egoh I Nihimiyas Mig-angay Hélusalém Dò

2 ¹Na, egoh sa bulan pinengadanan da Nisan diyà sa keduwa di pulù gepalay sa lugay i Altahilis migkedatù, egmenganawen ku wain sa datù enù ka iya sa galebek ku. Dodoo iya pelà sa anay kinehaa di sa palas ku egkebukul. ²Huenan di, inigsaan di aken, guwaen di, “Maen di ya éhê palas egkebukul ka? Endà ma atu eglinadu ka? Duen doo sa egkebukulan ko.”

Apiya di pa tigtu a nelimedangan, ³sinagbian ku doo sa datù, guwaen ku, “O Datù, ungayà ku kumelalù ka taman melugay. Egkebukul a enù ka nedaetan sa menuwa kenà di iglebeng sa medoo tupù ku, owoy neulow ma sa medoo pintù di.”

⁴Agulé inigsaan a sa datù, guwaen di, “Ngadan sa pegeniyen ko diyà kenak?”

Hê, migsimbà a diyà si Nemula, sa Nemula diyà langit, ⁵owoy sinagbian ku sa datù, guwaen ku, “O Datù, amuk meiyap ka owoy amuk

metuuwan ka diyà kenak, mepion amuk peipanaw ko aken mangay Huda dò anì pelumanan ku dema mael sa menuwa kenà di iglebeng sa medoo tupù ku.”

⁶Agulé mig-ikagi sa datù ligò di nesetépéd da sa booy, guwaen di, “Ngadan sa lugay ko dutu? Owoy nengan mendaa sa kepelikù ko dini?” Hê, mig-atu sa datù denu sa egoh ku mangay dutu Huda dò, huenan di mig-atas a ma sa egoh ku pelikù.

⁷Agulé migpegeni a ma diyà kenagdi, guwaen ku, “O Datù, amuk meiyap ka, begayi ko aken sa sulat ko diyà sa medoo ulu-ulu diyà sa tanà dutu sa lawa't wayeg Upelatis denu eledan agdaw^d anì pandayaen da aken umukit mangay Huda dò. ⁸Owoy egpegeniyen ku ma sa sulat ko diyà si Asap, sa atung tegebantay diyà sa ketalunan sa datù, anì begayan di aken kayu. Ungayaen ku sa medoo kayu anì baelan ku sa bengawan sa Dalesan i Nemula owoy sa kutà sa menuwa owoy sa dalesan kenà ku umugpà.”

Hê, hinoð sa datù sa langun pinegeni ku diyà kenagdi, enù ka mepion sa ketabang i Nemula diyà kenak. ⁹Pineunut ma sa datù diyà kenak sa medoo ulu-ulu sundalu owoy sa medoo sundalu egkudà. Agulé egoh ku migtebow diyà sa medoo ulu-ulu diyà sa tanà dutu sa lawa't wayeg Upelatis denu eledan agdaw, igbegay ku diyà kenagda sa sulat sa datù.

¹⁰Dodoo egoh da i Sanbalat tegeHolon owoy sa salu di si Tobiyas tegeAmoniya neketiig denu iya wé, tigtu da migbulit enù ka endà meiyap da amuk duen sa migtebow mangay umupion diyà sa medoo tegelslaél.

Ini Sa Egoh I Nihimiyas Migtelow Sa Kutà Sa Menuwa Hélsalém

¹¹Na, miglagbas a eg-angay Hélsalém dò, dodoo taman telu agdaw ¹²endà duen etaw tinulonon ku denu sa ipebael i Nemula kenak diyà sa menuwa Hélsalém. Hê, egoh di teliwadà sigep mig-enaw a owoy miglaun a owoy sa liyu duma ku. Endà duen sa hinagtay inuwit ké liyu daa sa asnu egkudaan ku. ¹³Tapay doo pelà sigep sa egoh ké miglaun eg-ukit diyà sa pinengadanan da Bengawan Lepak, agulé migtodò ké diyà sa pinengadanan da Paligì Uled, owoy miglagbas ké eg-angay diyà sa pinengadanan da Bengawan Buungan Lupuk. Ligò ké eg-ipanaw, hinahaa ku negubal sa kutà sa menuwa owoy neulow ma sa medoo pintù di. ¹⁴Agulé linagbasan ké ma egtelow sa pinengadanan da Bengawan Tebulan owoy sa Lanaw Datù. Dodoo endà duen ukitan sa asnu egkudaan ku enù ka nealang sa nelubakan sa kutà. ¹⁵Huenan di, mig-ukit ké polo diyà sa lepak Kidelon owoy sinugpayal ku ma sa kutà dahiya. Agulé egoh di endà pelà egsimag, migpelikù ké owoy mig-ukit ké dema diyà sa pinengadanan da Bengawan Lepak.

^d 2:7 Egoh sa kedaduan sa uwang tanà Pélsiya, nesakupan sa dakel menuwa denu eledan agdaw sa tanà Islaél.

¹⁶Na, endà neketiig sa medoo ulu-ulu diyà sa menuwa denu sa inangayan ku ataw ka sa binaelan ku. Enù ka endà pa duen sa tinulon ku diyà sa medoo duma ku etaw Hudiyu, iling ka sa medoo tegesimbà ataw ka sa medoo kaunutan ataw ka sa medoo ulu-ulu ataw ka muni dé etaw mulig diyà sa galebek. ¹⁷Dodoo egoh ku ubus dé migtelow, inikagiyan ku kagda, guwaen ku, “Egketiigan yu doo sa kelikutan egkehaa ta. Nedaetan sa menuwa Héluasalém owoy neulow ma sa medoo pintù di. Huenan di, baelan ta dema sa kutà di anì endà dé memalaan ki.” ¹⁸Agulé tinulonon ku ma kagda denu sa mepion ketabang i Nemula diyà kenak owoy denu ma sa inikagi sa datù diyà kenak.

Agulé mig-ikagi da, guwaen da, “Mepion amuk umedung ki dé dumulì mael.” Huenan di, pineges da sa keedung da eggalebek.

¹⁹Dodoo egoh i Sanbalat tegeHolon owoy sa salu di si Tobiyas tegeAmoniya owoy si Gesem tegeAlabiya migdineg denu iya wé, egpelonon da owoy eggemenan da ma kami. Mig-ikagi da, guwaen da, “Ngadan ini i niyu egbaelan? Iya kéen sa penemdem yu umatu yu diyà sa datù.”

²⁰Dodoo sinagbian ku kagda, guwaen ku, “Tabangan i Nemula kami, sa Nemula diyà langit. Huenan di, kami i eggsuguen di, pelagbas ké doo dumulì mael siini menuwa. Dodoo kiyu, endà duen sa niyu dahini, owoy endà ma duen sa ketuu yu ataw ka penemdem yu diyà siini menuwa Héluasalém.”

Ini Sa Egoh I Nihimiyas Mig-atu Diyà Sa Medoo Tegebogo

4 ¹Na, tigtu egbulit Sanbalat i egoh di nekedineg sa egoh ké egbael dulì sa kutà. Egkelangget owoy egpeumàumaan di ma kami i etaw Hudiyu. ²Huenan di, mig-ikagi diyà sa taengan sa medoo duma di owoy sa medoo sundalu tegeSamaliya, guwaen di, “Ngadan sa egbaelan siini medoo mekehiduhidu etaw Hudiyu? Enù di ya, baelan da dema dulì sa menuwa? Iya sa penemdem da kéen danà da egbegay sa hinagtay egimatayan da, meubus da kéen mael sa kutà amuk segeagdaw daa. Enù di ya, mekebael da kutà diyà sa medoo neulow dé batu?”

³Hê, mig-ikagi ma Tobiyas i tegeAmoniya ligò da nesetépéd si Sanbalat, guwaen di, “Tuu ma doo, apiya tinggalung daa sa kumagbul diyà sa kutà egbaelan da batu, megubal dé.”

⁴Agulé migsimbà a, guwaen ku, “O Nemula ké, dinegdineg ko kami, enù ka egpeumàumaan da kami. Pelikui ko mendaa diyà kenagda sa kepeumàumà da kenami. Mepion amuk metepel sa liyu etaw sa langun taman da owoy mesigkem da ma mekeangay diyà sa mediyù tanà. ⁵Yaka egpeuloy duu sa medoo kinetipay da owoy yaka ma egkelipeng duu sa medoo salà da, enù ka egtabiyaen da kami egdulì egbael sa menuwa.”

⁶Huenan di, egpelagbas ké mael sa kutà taman sa egoh di neteliwadaan dé sa kehagtaw di nekeulingut diyà sa menuwa, enù ka egtemù sa medoo etaw eggalebek.

⁷Dodoo tigtu migbulit Sanbalat i owoy si Tobiyas, owoy sa medoo tegeAlabiya owoy sa medoo tegeAmoniya owoy sa medoo tegeAsdod egoh da neketiig sa egoh ké egpelagbas egbael sa kutà sa menuwa Hélusalém owoy sa egoh di ma buyu dé egkeseagpet sa kutà. ⁸Huenan di, neseunut sa penemdem da mengayaw diyà sa menuwa Hélusalém anì melakà sa medoo etaw di. ⁹Dodoo migsimbà ké diyà si Nemula, sa Nemula ké, owoy duen ma sa pinebantay ké amuk agdaw owoy amuk sigep anì umingat ké.

¹⁰Egoh iya, eglebéhlebéh dé sa medoo etaw tegeHuda, guwaen da, “Egkelugpay dé sa medoo atung eg-uwit sa medoo mebegat, owoy danà di egkebugék sa medoo nelubak, huenan di endà ma dé mekebael ké sa kutà.”

¹¹Iya sa penemdem sa medoo kuntelà ké endà hauwen ké duu kagda owoy endà ma metiigan ké duu sa mebaelan da taman sa egoh da petow dé gumbek kenami owoy imatayan da ma kami anì mesabuhan sa kegalebek ké. ¹²Dodoo sa medoo duma ké Hudiyu nekeamut eg-ugpà diyà sa medoo kuntelà ké, takà da mig-angay diyà kenami anì tulonon da kami denu sa penemdem sa kuntelà ké mengayaw. ¹³Huenan di, pineangay ku sa medoo etaw anì bantayan da sa kutà sumalà dé sa kenà di endà pa neubus. Pineugpaan ku ma sa uman segeapilidu sa uman baed sa kutà endà pa neubus, owoy duen ma sa kinemkem da sundang owoy sigpù owoy busug.

¹⁴Na, egoh ku mighaa egkelimedangan sa medoo etaw, inikagiyan ku kagda owoy sa medoo ulu-ulu da owoy sa medoo kaunutan da, guwaen ku, “Yoko egkelimedangan na diyà sa medoo kuntelà ta. Penemdem yu polo Datù Nemula i, sa Nemula épê dakel egkegaga owoy sa mekepesu. Atu yu anì mealukan sa medoo duma telahadi ta owoy sa medoo sawa ta owoy sa medoo anak ta owoy sa kenà ta ma eg-ugpà.” ¹⁵Hê, nekedineg sa medoo kuntelà ké sa egoh ké neketiig sa penemdem da mael medaet diyà kenami, dodoo inalang i Nemula sa penemdem da. Huenan di, migpelikù ké dema langun eggalebek diyà sa kutà.

¹⁶Na, edung egoh iya, nebaed sa medoo etaw ku, enù ka sa baed sa eggalebek diyà sa kutà owoy sa baed ma sa egbantay. Migkemkem da sigpù owoy sundang owoy busug owoy igkegal da ma sa kegal épê anit. Egtulikan ma sa medoo ulu-ulu ké sa medoo tegeHuda ¹⁷atung egbael sa kutà. Hê, sa medoo atung eg-uwit sa medoo sangkap, eggalebek da sa dibaluy belad da owoy egsabà da ma kinemkem sa dibaluy belad da. ¹⁸Owoy sa medoo atung egbael kutà, egseliket da ma sundang ligò da eggalebek. Dodoo eg-unut-unut diyà kenak sa atung humiyup sa tegbuli. ^e ¹⁹Agulé inikagiyan ku sa medoo kaunutan owoy sa medoo ulu-ulu owoy sa langun etaw, guwaen

^e 4:18 Upama, egghiyupen di sa tegbuli anì tandaan di sa egoh sa medoo kuntelà da egtebow.

ku, “Tigtu dakel ini i galebek ta owoy nesepalak ma owoy nesetangkà ma sa elet ta egbael sa kutà. ²⁰Huenan di, amuk dinegen yu sa dagì tegbuli, petéél yu angay diyà kenak. Si Datù Nemula sa Nemula ta sa peatu kenita.”

²¹Huenan di, uman agdaw edung magtu kesimag taman sumigep, sa sebaed diyà sa kedoo ké egsabà kinemkem, ligò sa sebaed ma eggalebek diyà sa kutà. ²²Na, inikagiyan ku ma sa medoo ulu-ulu, guwaen ku, “Mepion amuk sa langun etaw lapeg sa medoo egsuguen da mangay da tumudug dalem sa menuwa Hélusalém amuk sigep anì mebantayan da amuk sigep owoy anì mekegalebek da ma amuk agdaw.” ²³Na, egoh iya, aken owoy sa medoo duma telahadi ku owoy sa medoo etaw ku owoy sa medoo agubalang ku, endà dé egpekesambi ké apiya sigep, owoy pulung dé igseliket ké sa kinemkem ké.

6:1-19 Na, si Sanbalat owoy si Tobiyas owoy sa medoo duma da tegeAlabiya, takaan da egbogo Nihimiyas i owoy sa medoo duma di etaw Hudiyu anì mealang sa kebael da duli sa kutà sa menuwa Hélusalém. Dodoo tabangan i Nemula doo sa medoo Hudiyu, huenan di neubus da dé egbael sa kutà diyà sa menuwa Hélusalém egoh di neuma lima pulu owoy duwa agdaw.

Ini Sa Egoh I Isdela Migbasa Sa Uledin I Nemula Diyà Sa Medoo Etaw

(Nihimiyas 8:1-9,12)

8 ¹⁻²Na, egoh sa muna agdaw diyà sa kepitu di gebulan, nesetipon sa langun etaw diyà sa duwangen selatal sa bengawan pinengadanan da Bengawan Wayeg. Agulé igsasà da diyà si Isdela anì uwiten di sa kalatas dinilin sinulatan sa medoo uledin igsugkow i Mosis, sa uledin igsugù i Datù Nemula diyà sa medoo tegeIslaél. Na, tegesimbà Isdela i, owoy kagdi ma sa tegetulù sa medoo uledin. Huenan di, inuwit di sa kalatas dinilin sinulatan sa uledin owoy migtigdeg diyà sa isaluwan sa medoo etaw nesetipon, sa medoo maama owoy sa medoo bayi owoy sa medoo mipedu dé batà. ³Edung magtu kesimag taman nekebugsang, mig-isalu Isdela i diyà sa duwangen selatal sa bengawan pinengadanan da Bengawan Wayeg, owoy binasa di sa uledin i Mosis diyà sa langun etaw épê keketiig. Tigtu egdinegdinegen da sa uledin igsugkow i Mosis.

⁵Migtigdeg Isdela i diyà sa nekepagtaw atung kenà egtigdeg anì eghahauwen sa langun etaw. Hê, migtigdeg da langun egoh da mighaa kenagdi egbekah sa kalatas dinilin sinulatan sa uledin i Nemula.

⁶Agulé inolò i Isdela Datù Nemula i, sa Nemula épê dakel egkegaga. Hê, migpetigdeg belad sa langun etaw owoy mig-ikagi da, guwaen da, “Amin. Tuu ini i.” Agulé migligkued da owoy igtenà da sa kilay da diyà tanà enù ka eg-oloen da Datù Nemula i.

⁷⁻⁸Agulé migtigdeg dema sa medoo etaw nesetipon owoy tinukid sa medoo tugod i Lebi egselepang diyà kenagda sa uledin i Nemula, anì

tigtu metiigan da sa binasa i Isdela.^f Na, iya sa ngadan siini medoo tugod i Lebi, si Hosuwi owoy si Bani owoy si Silibiyas owoy si Hamin owoy si Akub owoy si Sabitayi owoy si Odiyas owoy si Maasiyas owoy si Kelita owoy si Asaliyas owoy si Husabid owoy si Hanan owoy si Palaya. ⁹Na, egoh sa medoo etaw migdineg sa uledin i Nemula, migsinegaw da. Agulé si Nihimiyas sa ulu-ulu, owoy si Isdela sa tegesimbà owoy tegetulù uledin, owoy sa medoo tugod i Lebi egtulù diyà sa medoo etaw, anan da mig-ikagi diyà sa langun etaw nesetipon, guwaen da, “Ini sa agdaw tigtu mapulù diyà si Datù Nemula, sa Nemula egpigtuuwen ta. Huenan di, yoko egkebukul la owoy yoko ma egsinegaw wa.”

¹²Agulé miglikù sa langun etaw, owoy neanggan da egkaen owoy eginem, owoy egsebegayay da ma sa kaenen da. Tigtu da neanggan enù ka netiigan da dé sa selepangan sa kagi i Nemula binasa diyà kenagda.

Ini Sa Egoh Sa Medoo TegeIslaél Nesenuê

(Nihimiyas 9:1-3,26-38)

9 ¹Na, egoh sa keduwa di pulù owoy epat agdaw diyà iya wé bulan, nesetipon dema sa medoo tegeIslaél. Pineulan da sa kekaen da owoy migkawal da sa binekas sakù owoy binuhbuhan da ma abuh sa ulu da, enù ka tigtu da nebukul danà sa salà da. ²Migpeiges sa medoo tugod i Islaél diyà sa medoo etaw beken Hudiyu. Agulé migtigdeg da egoh da egtulon sa medoo salà da owoy sa salà sa medoo tupù da. ³Taman telu kaulas sa lugay da egtigdeg egdinegdineg sa kebasa sa uledin i Datù Nemula, sa Nemula egpigtuuwen da. Agulé taman telu kaulas ma sa lugay da egtulon sa medoo salà da owoy eg-oloen da ma Datù Nemula i, sa Nemula da.

²⁶Mig-ikagi da, guwaen da, “O Datù Nemula, apiya di pa dakel sa mepion ketabang igpeuloy ko diyà sa medoo tupù ké, endà doo egpangunut da diyà keniko. Dodoo egkuntelaen da polo kuna owoy ininiyugan da sa medoo uledin ko. Inimatayan da ma sa medoo tegesugkow kagi ko sa takà egsasà kenagda anì mekepelikù da diyà keniko, owoy mesagkat ma sa ketabiyà da keniko. ²⁷Huenan di, pinandayà ko ma kagda anì umuyayà dé sa medoo kuntelà da takà egpelihay kenagda. Dodoo egoh da nepelihay, eg-ingonoy da doo diyà keniko. Apiya di pa dutu ka langit dò, dinineg ko doo sa kesimbà da. Owoy danà sa dakel kehidu ko, pineangay ko sa medoo ulu-ulu anì mealukan da kedu diyà sa egkegaga sa medoo kuntelà da. ²⁸Dodoo egoh di migketanà dé sa keugpà da, binaelan da dema sa medaet diyà sa kehaa

^f 8:8 Sinelejang da sa uledin, enù ka apiya di pa kagi Hibelu siedò medoo uledin, beken langun da doo sa meketiig, enù ka iya daa sa kagi netiigan da sa kagi etaw tegeBabiloniya.

ko. Huenan di, pinandayà ko kagda anì umuyayà dema sa medoo kuntelà da. Dodoo egoh da nesenuî, migpegeni da dema tabang diyà keniko, owoy sinagipà ko doo apiya di pa dutu ka langit dò. Mesagkat sa kealuk ko kenagda danà sa dakel kehidu ko.

²⁹“Medoo dé gulê sinasà ko kagda anì pangunutan da sa medoo uledin ko. Dodoo tinipay da polo enù ka hagda munoy egkegaga daa sa egsaligan da. Endà pinangunutan da duu sa igsugù ko, apiya di pa melalù da hedem amuk tigtu da mangunut diyà sa medoo uledin ko. Danà sa ketegas lingoyen da, huenan di ininiyugan da kuna owoy mig-eked da ma egpangunut. ³⁰Dodoo danà sa kehidu ko, metaes polo sa tali ko diyà kenagda taman pila gepalay. Huenan di, inindaw ko ma kagda danà sa kagi igpesugkow sa Suguy ko diyà sa medoo tegesugkow kagi ko. Dodoo tapay doo endà egsagipaen da duu. Huenan di, igpeuyayà ko kagda diyà sa medoo liyu balangan etaw. ³¹Dodoo danà sa dakel kehidu ko, endà pedaetan ko duu kagda imet owoy endà ma tagakan ko duu, enù ka kuna sa Nemula tigtu mepion owoy mehidu.

³²“O Nemula, sa Nemula egpigtuuwen ké, tigtu dakel sa egkegaga ko. Mekepesu ka owoy épê ka dakel tunung. Kesaligan ka owoy ipetuu ko doo sa pasad ko kumehidu sa langun etaw. Huenan di, egpegeni ké anì sagipaen ko sa medoo lihay ké. Edung egoh sa medoo datù tegeAsiliya mig-uyayà kenami taman ini egoh di, dakel sa kelikutan nehaa ké, lapeg sa medoo datù ké owoy sa medoo ulu-ulu ké, owoy sa medoo tegesimbà owoy sa medoo tegesugkow kagi ko, owoy sa medoo tupù ké ma. ³³Uman pigtamayan ko kami, metudà sa kebael ko enù ka kesaligan ka, dodoo nesalà ké diyà keniko. ³⁴Na, sa medoo datù ké owoy sa medoo ulu-ulu ké, owoy sa medoo tegesimbà ké owoy sa medoo tupù ké ma, anan da endà migpangunut diyà sa uledin ko. Endà sinagipà da duu sa medoo igsugù ko owoy sa medoo igsasà ko diyà kenagda. ³⁵Egoh di duen pelà sa hagda munoy kedatuan, endà polo migpangunut da diyà keniko, apiya di pa medoo sa itabang ko diyà kenagda. Igbegay ko diyà kenagda sa melabel tanà tigtu kebaluyan, dodoo endà egsabuh da egbael salà owoy mig-eked da ma egpangunut diyà keniko.

³⁶“Huenan di, neudipen ké ini egoh di diyà siini mepion tanà tigtu kebaluyan sa igbegay ko diyà sa medoo tupù ké. ³⁷Apiya di pa medoo temù sa metebas diyà siini tanà, iya polo sa egpekekuwa sa medoo datù pineuyayà ko diyà kenami danà sa medoo salà ké. Egbaelan da sumalà dé sa egkeiyapan da diyà kenami owoy diyà sa medoo hinagtay ké ma. Huenan di, tigtu dakel sa kelikutan ké.

³⁸“Na, danà iya wé medoo egkebaelan ké, huenan di kami i etaw ko, egbael ké sa pasad tigtu meeles owoy isulat ké ma. Neseunutan ma sa medoo ulu-ulu ké owoy sa medoo tugod i Lebi owoy sa medoo tegesimbà.”

Ini Sa Kagi Sa Pasad Binaelan Da

(Nihimiyas 10:30-32,35-37,39c)

10 ³⁰Na, ini sa pasad binaelan ké. Endà pandayaen ké duu sa medoo anak ké sumawa diyà sa medoo liyu balangan etaw eg-ugpà diyà sa kenà ké.

³¹Amuk sa Agdaw Keetud ataw ka sa liyu agdaw mapulù diyà sa kehaa i Nemula, endà ma beliyen ké duu sa begas ataw ka sa liyu langun taman egdagangen sa medoo etaw beken Hudiyu diyà kenami.^g Owoy uman meuma sa kepitu di gepalay, endà galebeken ké duu sa tanà eghemulaan ké, owoy ipeuloy ké ma sa langun utang sa etaw diyà kenami.^h

³²Mangunut ké ma diyà sa uledin denu sa kebegay sa uman sebaen etaw sa tukéey pilak uman palay anì mekeenget sa pilak atang gamiten diyà sa Dalesan i Nemula.

³⁵Uwiten ké ma diyà sa Dalesan i Nemula sa letus diyà sa langun metebas ké uman palay, iling ka sa anay keketu ké diyà sa hinemulaan ké ataw ka sa anay kepupu ké sa bunga sa kayu hinemula ké.ⁱ ³⁶Owoy uwiten ké ma sa lebi lawa anak ké maama diyà sa medoo tegesimbà eggalebek diyà sa Dalesan i Nemula anì ipeépê ké diyà si Nemula. Hediya ma, ibegay ké ma sa anay anak sa langun hinagtay ké, iling ka sapi ataw ka kebilibili ataw ka kambing, enù ka iya sa igsugù diyà sa uledin igsugkow i Mosis.^j

³⁷Uwiten ké ma diyà sa medoo tegesimbà diyà sa Dalesan i Nemula sa anay alina gineléh ké owoy sa letus teligo uman palay.^k Ibegay ké ma sa anay bunga pinupu ké diyà sa medoo kayu hinemula ké, owoy sa anay wain binaelan ké diyà sa bunga palas ké owoy sa anay lana olibu binaelan ké.

Ibegay ké ma sa sepulù pelesintu diyà sa langun metebas ké, owoy ibegay ké diyà sa medoo tugod i Lebi, enù ka kagda sa atung tegeetuk sa sepulù pelesintu diyà sa medoo menuwa ké.^l

^{39c}“Endà ma pandayaen ké duu sa Dalesan i Nemula, sa Nemula ké.”

^g 10:31 Basa ko Dutilonomiyu 5:12-14 ^h 10:31 Basa ko Lébitiko 25:2-4; owoy Dutilonomiyu 15:1-3 ⁱ 10:35 Basa ko Dutilonomiyu 26:2-4 ^j 10:36 Basa ko Éksodo 22:29-30; 34:19-20 ^k 10:37 Basa ko Lébitiko 23:17 ^l 10:37 Basa ko Lébitiko 27:30-33